

48 wa malembe ekhotsweni mayelana no xisa vahakelaxibalo

Tshwane, 24 Mhawuri 2021 – Wanuna loyi a xiseke vahakelaxibalo vo hlaya, Khathutshelo Mashau u gweviwile 48 wa malembe yak u khotsiwa ko kongoma endzhaku ko voniwa nandzu eka milandzu ya vukhamba, vukungundzwana na ntlulo wa Nawu wa Nsirhelelo wa Vugevenga bya Mitlawwa (POCA).

Khoto ya Majisitarata wa Boksburg yi twile hi laha SARS yi nga kuma xivilelo ku suka eka muhakelaxibalo xa leswaku mbuyiselo wa yena wa malinghena ya xibalo xa munhu yena n'wini wu hakeriwile eka akhawunti ya bangi leyi hoxekeke. SARS yi endlile ndzavisiso no kuma leswaku mbuyiselo wu hakeriwile eka akhawunti ya FNB eka vito ra Khathutshelo Mashau.

Swi tlhele swi kumeka leswaku mivuyiselo yo hlaya ya vahakelaxibalo van'wana yi hakeriwile eka akhawunti yo fana. Vahakelaxibalo lava khumbhekaka va alerile ku va na vutivi bya akhawunti ya FNB leyi amukeleke mivuyiselo. Va tlhele va vula leswaku a va kombelangi leswaku vuxokoxoko bya vona n'wini na tiakhawunti ta le bangi swi cincerwa eka Khathutshelo Mashau.

Mashau a ri na akhawunti yin'wana na Capitec laha ku nga hakeriwa mivuyiselo ya mune ya vuxisi ya xibalo xa malinghena xa munhu yena n'wini. A ku na mivuyiselonzhaku leyi nga endlwa tanihileswi timali hinkwato a ti tekiwile loko ndzavisiso wu sungula.

Khomixinara wa SARS Edward Kieswetter u lemukisile vahakelaxibalo ku tirhisa ntsena vatokoti va swa xibalo lava tsarisiweke ku va pfuneta hi timhaka ta vona ta xibalo.

"Vanhu lava pfumalaka mithwaso ya xibalo na lava tshembisaka vahakelaxibalo mivuyiselo leyikulu, va tala ku tinghenelerisa eka migingiriko ya swa vuxisi leyi nga ta vavisa muhakelaxibalo. Vahakelaxibalo va fanele va mangala vanhu valavo xikan'wekan'we leswaku vahakelaxibalo van'wana va ta sirheleleka eka swigevenga leswi.

"SARS yi endla swi twala eka vahakelaxibalo no nyika ntiyisiso eka tichanele leti faneleke ku tirhisiwa ku thiransakita na SARS naswona leti hi tona tichanele leti faneleke ku tirhisiwa ntsena. Loko tichanele leti ti nga ringanelangi ku tirhana na swilaveko swa muhakexibalo, va fanele va tirhisa vukorhokeri bya mutokoti wa swa xibalo," ku vurile Khomixinara Kieswetter.

Ku mangala vukungundzwana byin'wana na byin'wana lebyi ehleketeleriwaka, vahakelaxibalo va nga tirhisa Nomboro yo Mangala Vukungundzwana ya SARS ya 0800 00 2870.